



Fernand ETGEN
 President vun der
 Deputéiertechamber
 19, um Krautmaart
 L-1728 Lëtzebuerg

Lëtzebuerg, den 24/11/2020

Här President,

Sou wéi den Artikel 84 vun eisem Chambersreglement et virgesäit, bieden ech Iech, dës dringend parlamentaresch Fro un de Minister fir Bildung weiderzeleeden.

An der Äntwert op meng parlamentaresch Fro Nummer 2850, an där ech wësse wollt, wéi d'Leierpersonal virgoe soll, wann Eltere si iwwert eng Covid-Infektioun innerhalb vun hirer Klass informéieren, éier si vun der Santé kontaktéiert ginn, huet de Minister gesot:

Et läit op der Hand, datt den Titulaire de classe, dee vun den Elteren iwwert d'COVID-19-Infektioun vun hirem Kand informéiert gouf, des Informatioun, iwwert d'Regionaldirektioun respektiv d'Lyceesdirektioun un d'Cellule de coordination weiderleet. A Recksprooch mat der Direktioun vun der Sante ennerhelt des all weider Schrëtt fir jee no Situatioun enger Verbreedung vum Virus efficace entgeintzewierken.

[...]

Ewei et aus de Circulären un d'Schoul- an d'Lyceespersonal evirgeet, gett mäi Ministere, soubal e vun enger Direktioun informéiert gett, dass eng Covid-19-Infektioun an enger Schoul virläit, dest weider un d'Cellule de Coordination. Des Cellule mecht op deeglecher Basis e Rapport zur aktueller Situatioun an de Schoulen a steet all Dag a Kontakt mam Comité de Pilotage "Covid-19 and Education". Wann et neideg wier, kann dese Comité de Pilotage dei neideg Mesure decideieren.

D'Mesure vun der Quarantän ennerläit hei der Autoriteit vun der Direktioun vun der Sante. Nemme si dierf hefir den Accord ginn a bestemmte Schüler, Klassen oder ganz Cyclen a Quarantän setzen.

Ouni en Accord vun der Direktioun vun der Santé kann eng Schouklass soumat net vum Presenzunterricht ausgeschloss an a Quarantän gesat ginn.

Opgrund vun den aktuell héijen Infektiounszuelen hunn d'Cellule de coordination, de Comité de Pilotage "Covid-19 and Education" an d'Direktioun vun der Santé zurzäit awer esou vill



Fäll ze traitéieren, dass et hinnen net ëmmer méiglech ass, an engem Delai ze reagéieren, deen et hinne wierklech géif erlaben, enger Verbreedung vum Virus *beschtméiglech* entgeintzewierken.

Esou ass et z. B. e Méindeg an enger Schoul aus dem Fundamental hei am Land zu enger Situatioun komm, wou eng Klass, aus där dräi Kanner positiv op de Virus getest goufen, trotzdeem an d'Schoul huet misste goen, well d'Direktioun vun der Santé nach keng Quarantän ausgeschwat hat, just fir dass d'Kanner du Mëttes op Uerder vum Ministère awer nees Heem geschéckt gi sinn.

An der selwechter Gemeng sinn och nach aner Klassen am Homeschooling.

An deem Zesummenhang wéilt ech dem Minister dës Froe stellen:

1. Kann de Minister bestätegen, dass et opgrond vun den aktuell héijen Infektiounszuele Problemer gëtt, Quarantainen zäitno no engem positiven Testresultat ze ordonéieren?
2. Hält d'Regierung un där an der Äntwert op d'Fro Nummer 2850 beschriwwener Prozedur fest, dass et enger Schoul net erlaabt ass, eng Klass a Quarantän ze setzen, éier eng Ordonnance vun der Direktioun vun der Santé virläit?
Falls jo: Wéi wëll de Minister verhënneren, dass et an Zukunft zu weidere Fäll, wéi deem hei beschriwwene kennt?
Falls nee: Wéi gesinn déi nei Prozeduren aus a kréien d'Regionaldirektioune méi Pouvoiren, wann et drëms geet Klassen a Quarantain ze setzen? Kritt och den Educationministère zousätzlech Kompetenzen, wann et drëms geet, Klassen a Quarantain ze setzen?

Mat déiwem Respekt,



CLEMENT Sven
Député

Le caractère urgent de la question a été reconnu (25.11.2020)



Äntwert vum Minister fir Educatioun, Kanner a Jugend op d'parlamentaresch Fro Nr. 3197 vum honorabelen Här Deputéierte Sven Clement

Ad 1)

D'Direktioun meldt dee positive Fall der Cellule de coordination. An der Cellule gëtt an Zesummenaarbecht mat der Inspection sanitaire gepréift, ob d'Klass à l'écart gesat gëtt (am Zenario 1) oder op eng Quarantaine (Zenario 2) gesprach muss ginn. Dës Situatioun gëtt am Laf vum Dag mat der Inspection sanitaire analyséiert an d'Direktioun gëtt iwwert d'Mesure, déi en place gesat muss ginn, informéiert.

An der aktueller Situatioun, bei héijen Infektiounszuelen, kann et sinn, datt Fäll, déi owes spéit gemellt ginn, eréischt den aneren Dag mat der Inspection sanitaire analyséiert kënnen ginn.

Ad 2)

D'Mise en quarantaine ass en Dispositiv, deen ausschliisslech vun der Direction de la Santé gesprach ka ginn. Eng Klass, an där d'Fro vun enger Quarantaine sech stellt, ass am Prinzip jo schonns à l'écart par rapport zu deenen anere Klasse vun der Schoul opgrond vun engem 1. positive Fall an där selwechter Klass.

Wann zwee positiv Fäll der Direktioun an der nämmelechter Klass gemellt ginn, setzt d'Direktioun d'Klass no Récksprouch mat der Cellule de coordination schonns à l'écart bis d'Fäll confirméiert sinn an d'Analys mat der Inspection sanitaire ofgeschloss ass.